




Republika e Kosovës Republika Kosova - Republic of Kosova

AGJENCIA KUNDËR KORRUPSIONIT
AGENCIJA PROTIV KORUPCIJE
ANTI - CORRUPTION AGENCY

Duke u bazuar në nenin 11 paragrafi 1.1, nenin 5 paragrafi 1.5 dhe nenin 18 paragrafi 10 dhe 11 të Ligjit nr. 03/L-159 për Agjencinë kundër Korrupsionit si dhe nenin 24 paragrafi 11 dhe 12 të Rregullorës së Punës të Agjencisë kundër Korrupsionit, Drejtori i Agjencisë kundër Korrupsionit me datë 10.11.2015, nxjerr këtë:

V E N D I M

I. Mbyllet rasti me Nr. AKK-03-02-3025-15 për z.Rafet Rama – Deputet në Kuvendin e Kosovës, për shkak se nuk ka prova të mjaftueshme që dëshmojnë situatën me konflikt interesi në ushtrimin e funksionit të tij publik .

II. Rasti mund të rihapet në çdo kohë kur mund të paraqiten rrethana të reja.

A r s y e t i m

I. Rasti i hapur nën dyshimin e bazuar për Konflikt interesi në ushtrimin e funksionit publik, me nr. AKK-03-02-3025-15, për Zyrtarin e lartë, z. Rafet Rama – Deputet në Kuvendin e Kosovës dhe njëkohësisht i punësuar në Ndërmarrjen private IFJB “Capital” sh.p.k., është trajtuar sipas procedurës së paraparë ligjore, për parandalimin e konfliktit të interesit në ushtrimin e funksionit publik (Ligji Nr. 04/L-051).

Zyrtari i lartë, z.Rama fillimisht është njoftuar me një shkresë zyrtare nga Agjencia kundër Korrupsionit, pas të cilës ai është paraqitur në takim me zyrtarët e Agjencisë kundër Korrupsionit, me ç’rast, janë ballafaquar faktet në lidhje me dyshimet e hedhura për konflikt interesi në ushtrimin e funksionit publik.

Në këtë takim nga z.Rama është kërkuar që ai të na dëshmojë me Kontratë cila është pozita e tij dhe cilat janë detyrat dhe obligimet e tij në institucionin financiar “Capital” Sh.p.k.

Z.Rama në Agjencinë kundër Korrupsionit ka sjellë Kontratën e kaluar dhe atë valide me IFJB “Capital” sh.p.k. (DPK/DPKI-03-02-3655/15) në të cilat shihet se ai ka pasur një Kontratë në periudhën prej 01.03.2013 deri 01.03.2015, në pozitën “Koordinator për punë në IFJB “Capital”.

Kjo kontratë, me po këto detyra dhe përgjegjësi, z.Rama i është vazhduar përsëri me datë 01.03.2015 deri në periudhën 31.12.2015.

Ligji për Parandalimin e konfliktit të interesit në ushtrimin e funksionit publik, nuk ka paraparë brenda këtyre konditave, ndalesë ose kufizim në ushtrimin e funksionit publik.

Ndërsa Ligji për të Drejtat dhe Përgjegjësitë e Deputetit (Nr.03/L-111), në kuadër të Mospërputhshmërisë me aktivitetet ekonomike, për Deputet ka paraparë ndalesa që ata të mos kenë të drejtën të jenë Anëtar të Bordit në ndonjë kompani private ose publike (Neni 7, paragrafi 1). Pastaj, po ashtu me këtë ligj ndalohet që Deputeti gjatë mandatit të tij të veprojë në cilësinë e këshilltarit apo përfaqësuesit ligjor i kompanive private ose bizneseve (Neni 7, paragrafi 2), si dhe disa ndalesa tjera, por që nuk lidhen me rastin konkret dhe me pozitën konkrete të Deputetit Rama, të prezantuar sipas kontratës.

Megjithatë zyrtari i lartë publik z.Rafet Rama duhet që gjithmonë gjatë ushtrimit të funksionit publik të ketë parasysh situatën e konfliktit “rast për rast” të interesit. Ne raste të tilla ai, si dhe çdo zyrtar i lartë publik duhet të respektojë dhe të veprojë në pajtim me nenin 13, paragrafi 1, 2, 3, të Ligjit për parandalimin e konfliktit të interesit në ushtrimin e funksionit publik, i cili shprehimisht thotë:

1. Çdo zyrtar i lartë gjatë ushtrimit të funksionit të tij publike, në bazë të njohurive të tij dhe në mirëbesim, detyrohet që të bëjë vet deklarimin paraprak, rast për rast, të ekzistencës së interesit të tij private lidhur me vendimmarrjen në një çështje të caktuar, që mund të bëhen shkak për lindjen e një konfliktit të interesit.
2. Deklarimi rast për rast i interesave private bëhet çdo herë nga zyrtari i lartë, kur kjo kërkohet nga eprori ose nga institucioni mbikëqyrës. Deklarimi si rregull duhet kërkuar dhe bërë paraprakisht. Kur kjo nuk është e mundur ose kur nuk ka ndodhur, deklarimi duhet të kërkohet të bëhet sa më shpejt që të jetë e mundur.
3. Vetë deklarimi si rregull bëhet me shkrim, kur zyrtari i lartë përfshihet në një vendimarrje për ndonjë çështje të caktuar.

II. Në pajtim me nenin 18 paragrafi 11 të Ligjit nr. 03/L-159 për Agjencinë kundër Korrupsionit. Agjencia mund të rihap rastin në çdo kohë nëse paraqiten rrethana të reja.

Andaj u vendos si në dispozitiv të këtij vendimi.

Vendimi iu dërgohet:

- Zyrtari i lartë publik
- Drejtorit të DPK-së
- Z./znj. (zyrtari përgjegjës)
- Z./znj. (zyrtari ndihmës)

Drejtori Agjencisë kundër Korrupsionit

/ Hasan Preteni

